



Broj: 01/3-50-1-29-16/04  
Sarajevo, 4. novembra 2004. godine

**Z A P I S N I K  
16. sjednice Komisije za vanjsku trgovinu i carine  
Predstavničkog doma Parlamentarne skupštine BiH,  
održane 4. novembra 2004. godine**

Sjednica je počela u 8:30.

Sjednicom je predsjedavao Petar Kunić, predsjedavajući Komisije.

Sjednici su prisustvovali: Marija Perkanović, Filip Andrić, Mladen Potočnik, Nikola Kragulj i Ibrahim Đedović.

Opravdano odsustvovali: Izet Hadžić, Fatima Leho i Azra Hadžiahmetović.

Sjednici je prisustvovao Peđa Milanović, stručni savjetnik u Ministarstvu vanjske trgovine i ekonomskih odnosa u Sektoru za vanjskotrgovinsku politiku i strana ulaganja i Emira Češljar, sekretar Komisije.

Za sjednicu Komisije je predložen i jednoglasno usvojen sljedeći

**D N E V N I R E D**

1. Usvajanje Zapisnika 15. sjednice Komisije
2. Realizacija Zaključka 15. sjednice Komisije u vezi utvrđivanja Prijedloga za davanje autentičnog tumačenja člana 29., stav 2. Zakona o slobodnim zonama u Bosni i Hercegovini D.o.o.»Slobodna zona Visoko»
3. Realizacija Zaključka 9. sjednice Komisije u vezi davanja stručnog mišljenja D.o.o. «Ilić-Komerc» Stanari-Doboj o spornim tarifnim brojevima iz Carinske tarife Bosne i Hercegovine
4. Realizacija Zaključka 9. sjednice Komisije u vezi Prijedloga zakona o izmjenama i dopunama člana 162. Zakona o carinskoj politici BiH sa Odlukom Upravnog odbora Uprave za indirektno oporezivanje
5. Tekuća pitanja.

**Ad-1**

Zapisnik 15. sjednice Komisije usvojen je jednoglasno bez primjedbi.

## **Ad-2**

### **Realizacija Zaključka 15. sjednice Komisije u vezi utvrđivanja Prijedloga za davanje autentičnog tumačenja člana 29., stav 2. Zakona o slobodnim zonama u Bosni i Hercegovini D.o.o.Slobodna zona Visoko**

Sekretar Komisije dala je kratko obrazloženje da je Komisija na osnovu člana 1.5. Zaključka Predstavničkog doma o autentičnom tumačenju zakona, drugih propisa i općih akata obavezna utvrditi prijedlog autentičnog tumačenja člana 29., stav 2. navedenog Zakona, uz napomenu da je Ministarstvo vanjske trgovine i ekonomskih odnosa dostavilo odgovor na Zaključak Komisije s prethodne sjednice.

Dodatno obrazloženje u ime resornog ministarstva dao je Peđa Milanović dodavši da je prije godinu dana Federalnom ministarstvu finansija- Carinskoj upravi, u istom predmetu odgovoreno da izmjena člana 29., stav 2. Zakona o slobodnim zonama u Bosni i Hercegovini nije u suprotnosti sa Zakonom o carinskoj politici Bosne i Hercegovine i da je u konkretnom slučaju potrebno ispoštovati carinsku proceduru i robu staviti u slobodan promet, da bi mogla biti upotrijebljena za proizvodnju proizvoda odobrenih za proizvodnju u slobodnoj zoni. Na to upućuju odredbe člana 19., stav 6., člana 100. Zakona o carinskoj politici Bosne i Hercegovine i odredbe Odluke o uvjetima kojima podliježe povoljni tarifni postupak, iz koga određena roba radi konačne namjene može uživati određene pogodnosti.

U raspravi su učestvovali Mladen Potočnik i Petar Kunić.

Imajući u vidu da su članovi Komisije na prošloj sjednici dobili koncept Prijedloga za davanje autentičnog tumačenja člana 29., stav 2., Komisija je jednoglasno z a k l j u č i l a da na osnovu člana 1.5. Zaključka o autentičnom tumačenju zakona, drugih propisa i općih akata utvrdi prijedlog za davanje autentičnog tumačenja člana 29., stav 2. Zakona o slobodnim zonama u Bosni i Hercegovini i dostavi Ustavno-pravnoj komisiji Predstavničkog doma na daljnje postupanje.

## **Ad-3**

### **Realizacija Zaključka 9. sjednice Komisije u vezi davanja stručnog mišljenja D.o.o. «Ilić-Komerc» Stanari-Doboj o spornim tarifnim brojevima iz Carinske tarife Bosne i Hercegovine**

D.o.o.«Ilić-Komerc»Stanari-Doboj uputilo je zahtjev Parlamentarnoj skupštini Bosne i Hercegovine u vezi dobijanje stručnog mišljenja o spornom tarifnom broju 1211 90 00 10 i tarifnom broju 0902 40 00 00 koji se odnose na svrstavanje robe u Carinsku tarifu BiH ("Službeni glasnik BiH", broj 40/03) za 2004. godinu Zakona o carinskoj tarifi Bosne i Hercegovine.

Kolegij doma 2.6.2004. godine odredio je Komisiju kao nadležnu za provođenje procedure po navedenom zahtjevu.

Komisija je na 9. sjednici, održanoj 25.6.2004. godine, upoznata sa zahtjevom i zaključila da će nakon dobijanja izvještaja Ustavno-pravne komisije, kao nadležna komisija, provesti proceduru na osnovu Zaključka o autentičnom tumačenju zakona, drugih propisa i općih akata Predstavničkog doma Parlamentarne skupštine BiH ("Službeni glasnik BiH", broj 24/04).

Ustavno - pravna komisija Predstavničkog doma ocijenila je da se navedene odredbe koje glase:

**“0902 40 00 00 –ostali crni čaj, (fermentirani) i ostali djelimično fermentirani čaj, stopa carine 0%”**

**“1211 90 00 10- bilje i dijelovi bilja.. pakovano do 100 gr – stopa carine 0% + 6,00 KM/kg”** ne mogu različito razumijevati i da su odredbe sasvim jasne i nema potrebe davati autentično tumačenje.

Također i resorno ministarstvo je utvrdilo da je u konkretnom slučaju potrebno dati stručno mišljenje o pravilnom svrstavanju domaćeg čaja u Carinsku tarifu Bosne i Hercegovine, koja je sastavni dio Zakona o Carinskoj tarifi BiH.

Komisija je jednoglasno usvojila zaključak:

Podnosioca zahtjeva obavijestiti da je Komisija za vanjsku trgovinu i carine, kao nadležna Komisija, razmatrala zahtjev i Izvještaj Ustavno-pravne komisije i da na osnovu odredbi člana 38. Poslovnika Predstavničkog doma nije nadležna za davanje stručnog mišljenja o Zakonu.

U konkretnom slučaju potrebno je dati stručno mišljenje o spornim tarifnim brojevima vezano za pravilno svrstavanje domaćeg čaja u Carinsku tarifu Bosne i Hercegovine, koja je sastavni dio Zakona o Carinskoj tarifi Bosne i Hercegovine.

Na osnovu odredbi Zakona o ministarstvima i drugim organima uprave Bosne i Hercegovine i Zakona o upravi za provođenje zakona iz oblasti carinsko-tarifne politike nadležno je Ministarstvo vanjske trgovine i ekonomskih odnosa.

#### **Ad- 4**

#### **Realizacija Zaključka 9. sjednice Komisije u vezi Prijedloga zakona o izmjenama i dopunama člana 162. Zakona o carinskoj politici BiH sa Odlukom Upravnog odbora Uprave za indirektno oporezivanje**

Komisija je na 9. sjednici 25.6.2004. godine zaključila da će se Prijedlog zakona o izmjenama i dopunama Zakona o carinskoj politici BiH u vezi sa članom 162., stav 2. upućen od Vijeća ministara u parlamentarnu proceduru 9.4.2004. godine, kao i izmjena člana 162. istog Zakona upućena 16. 6. 2004. godine ponovo razmatrati kada dobije izjašnjenje, odnosno stav Upravnog odbora Uprave za indirektno oporezivanje. Članovi Komisije upoznati su s Odlukom Upravnog odbora od 23. 8. 2004. godine na 15. sjednici Komisije, a radi kratkoće vremena zbog ranije stvorenih obaveza pojedinih članova Komisije odloženo je razmatranje za ovu sjednicu.

Ovom Odlukom Upravni odbor Uprave za indirektno oporezivanje odobrava da se roba, koja se stavlja u slobodan promet i koja je namijenjena za deminiranje, oslobađa od plaćanja carinskih dažbina odmah, kako je to predloženo izmjenom člana 162, a ostale izmjene odlažu se do 1.1.2005. godine.

Komisija je, imajući u vidu da su oba doma Parlamentarne skupštine usvojila u oktobru 2004. godine, u različitom tekstu, Prijedlog Zakona o carinskoj politici Bosne i Hercegovine, upućenog u parlamentarnu proceduru od Vijeća ministara BiH

28.7.2004. godine, i da član 176. ovog zakona sadrži predložene izmjene već spomenutih prijedloga izmjena navedenog Zakona, mišljenja da je bespredmetno aktuelizirati daljnji rad na predloženim izmjenama člana 162. Zakona o carinskoj politici Bosne i Hercegovine, koji je sada na snazi.

#### **Ad-5**

##### **Tekuća pitanja**

Mladen Potočnik predložio je da se Komisija obrati Ministarstvu vanjske trgovine i ekonomskih odnosa sa zahtjevom za dostavljanje izvještaja o strategiji izvozno-uvozne politike u Bosni i Hercegovini, imajući u vidu dosadašnji debalans i njegov rast, što se negativno odražava na ekonomski razvoj Bosne i Hercegovine.

Prijedlog Mladena Potočnika Komisija je jednoglasno podržala i zaključeno je da se na osnovu navedenog prijedloga obrati ministru Ministarstva vanjske trgovine i ekonomskih odnosa.

Sjednica je završena u 9:15.

Sastavni dio Zapisnika je Prijedlog za davanje autentičnog tumačenja člana 29., stav 2. Zakona o izmjenama i dopunama Zakona o slobodnim zonama u Bosni i Hercegovini.

Sekratar Komisije  
Emira Češljarić

Predsjedavajući Komisije  
dr. Petar Kunić